

# Rapport da gestiun 2019 dil president dalla pleiv catolica romana Trun

Preziau sur Tomasz  
Preziadas parochianas, preziai parochians

En miu emprem rapport sco president dalla baselgia catolica romana da nossa vischnaunca dundel a vos las necessarias informaziuns sur dil passau en nies cumin-baselgia durant igl onn d'uffeci vargau.

## 1. General

Era durant gl'onn vargau ei la religiun stada in tema per las medias, seigia quei ella practica dalla baselgia catolica en connex cun violenza ed abusi (Missbrauch) ni era tier il zölibat. Medemamein ei era la funcziun ed igl engaschament dallas dunnas enteifer nossa baselgia in tema fetg actual.

*Ina Pleiv sa mo funcziunar endretg aschiditg sco ella vegn pastorada activamein. Il problem da munconza da spirituals vegnin era nus plaunsiu a sentir pli fetg, han differentas pleivs giu uonn sur pli liung temps negin agen plevon. Nossa pleiv ha il cletg dad haver giu durant gl'onn vargau in plevon engaschau, iniziativa e cun in bien maun per ses parochians. Persuenter essan nus a nies augsegner, **sur dr. Tomasz Piotr Drwal**, fetg engrazievels.*

### a) Suprastonza

Suenter in temps d'entschatta sundel sevivius en detg pulit. La collaboraziun denter la suprastonza ha funcziunau per mia cumpleina cuntentientscha. Nus havein structurau ils prozess da lavur aschia ch'ei ha constau per mintga suprastont. En quater sedutas ei la suprastonza seradunada ed ha liquidau ils pensums adossai ad ella. Pensums delegai ad in ni l'auter per liquidaziun (art. 24 dalla constituziun) ha il responsabel sligiau e sch'igl ei stau necessari ha la suprastonza s'ancziunau quella decisiun. La collaboraziun cun il cussegl pastoral cun sia iniziativa presidenta **Cristina Derungs-Lutz** ha funcziunau fetg bein.

### b) La pastoraziun

Grazia agl engaschi da nies zun preziau plevon sur Tomasz Piotr, mo era cun igl agid da tut ils auters gremis dallas pleivs e caplania en special la gronda lavur dil secretariat, dil cussegl pastoral e dalla catecheta ha la pastoraziun funcziunau senza pli gronds incaps.

### c) Instrucziun religiosa

Naven digl atun vargau dat ei mo pli in'ura da religiun per tuttas classas, l'autra ura vegnan ils affons instrui en il rom d'etica. Nus formein cun la vischnaunca da Sumvitg in consorzi da scola.

Per procurar per nos affons in'instrucziun adattada per la s. Comuniun e la s. Creisma havein ordeifer il program da religiun fixau in'instrucziun supplementara en fuorma da projects d'instrucziun. Quella instrucziun succeda entras la catecheta Isabelle Defuns-Gamboni per nos premcommunicants ed il catechet Hubert Venzin instruescha ils cresments. Ils detagls han els fixau ensemen cun nies plevon.

Dapi Igl atun vargau ha ei dau discussiuns ellas classas dalla scola superiura pertuccond l'ura da religiun. Plirs affons han dau da saver ch'els vegnen buc pli a separticipar all'ura da religiun naven digl onn da scola 2020/2021. Ensemen cun Walter Deplazes, president dalla pleiv da Sumvitg, essen nus vid divers discursos cun scolars, geniturs e la catecheta Gabi Cabalzar per sclarir co agir vinavon.

### d) Veta e mort

Mintgin ha siu agen pensum che sin tiara e quel entscheiva cun la naschientscha e finescha cul viadi en la perpetnada. Veta e mort stattan datier in da l'auter. Durant il davos onn havein nus stuiu prender cumiau da caras concristianas e concristians. Denton havein nus era saviu selegrar ensemen cun ils geniturs da novs battegiai.

Davos la statistica stattan muments grevs mo era uras legrevilas.

Battens	8 a Trun e 2 a Schlans
Premcommunicants	7 affons
Nozzas	5 a Trun ed 1 a Schlans
Extrada ord la baselgia	2 a Trun ed 1 a Schlans
Mortoris	18 a Trun ed 1 a Schlans

A tuttas defunctas e defuncts engraziel per il bien che nus havein astgau retscheiver dad els. Allas famiglias en malencurada esprimin nus nossa pli sincera condolientscha.

## 2. Engaschis en la pleiv

Enteifer la communitad cristiciana sin territori da nossa vischnaunca havein nus ina liunga roscha da fideivlas collaboraturas e collaboraturs e quei duront pli liung temps ora. Nus havein in zun activ cussegl pastoral, fideivels e cunscienzius ugaus capluttas ed ina massa autras persunas che fan el zuppau ina gronda lavur ch'ins vesa in summa buca. Menziunar lessel era il cussegl pastoral, la lavur cun las ministrantas e ministrants sco era la lavur dallas calustras, dils ugaus capluttas e dils organists, era lessel punctuar la lavur da biars che vegn prestada voluntariamein duront igl onn ora.

Allas persunas sengaschadas lessel far in compliment per tut lur engaschi per il beinstar da nossa baselgia: La lavur cun las ministrantas ed ils ministrants ed il survir messa, lecturas, catecheta, l'organisaziun entuorn mintga sepultura, ils organists, ils chors, ils dirigents dil chor da sepultura ed il chor cecilian, l'uniun da mummas e dunnas, l'uniun da giuventetgna cun ornar l'intrada alla baselgia cun tschuppi e fluras, la musica instrumentala per embellir las fiastas e secapescha era tuttas persunas ch'orneschan e schubregian las baselgias.

La primavera vargada ha il chor da sepultura communicau ch'els calien da cantar mintgamai il di da sepultura. Suenten in engaschi da 20 onns ei il fundatur, dirigent ed organist dil chor, Albert Decurtins, muort vegliadetgna sedecidius da demissionar. Cunquei che plirs commembers dil chor han demmissionau, eis ei bu pli stau pusseivel da cuntinuar. Per quei grond engaschi dil dirigent ed dils commembers dil chor engraziel en num da vus tuts.

En special lessel menziunar igl engaschi da dunna **Rilana Cadruvi Scherrer**. Ensemen cun siu um **Clau Scherrer** e nossa catecheta Isabelle Defuns organiseschan els in chor d'affons ad hoc, il qual conta mintgamai tier specialas occasiuns nua ch'ils affons statan el center dil survetsch divin. Era all'uniun da mummas e dunnas engraziel per tut lur engaschi. Ellas organiseschan il solver per ils affons suenter las messas da scola, han quitau dalla vestgadira dils premcommunicants ed il bi usit dils retgs sco era per il lavar ora tut ils sanctuaris. Senza igl engaschi dallas mummas e dunnas fuss quei tut buca pusseivel! Era a nossas ugaus e nos ugaus caplutta auda in special engraziament, preparan els mintgamai las capluttas per il survetsch divin e han quitau dalla facultad da mintga caplutta. Cunquei che nus havein per la caplutta Nossadunna dalla Neiv a Schlans negin ugau, procura dunna **Renata Pfister-Maissen** voluntariamein igl usitau quitau dalla caplutta.

Buca emblidar d'engraziar lessel per las activitats entuorn las processions e sepulturas, A **Giusep ed Isabelle Defuns** per il riug da sepultura, allas **giuvnas** per il purtar la Nossadunna mintgamai da perdanonza sco era tut quels che **portan ils cafanuns** tier mintga fiasta. Alla **suprastonza communal** saudi in cordial engraziament per purtar mintga fiasta ecclesiastica il balduchin. Aschia vegnan fiastas embellidas e la veta da cuminonza viva.

A gl'entir **cussegl pastoral**, cun l'engaschada presidenta Cristina Derungs-Lutz, actuara e las menadras da gruppa ditgel in sincer engraziel fetg per lur bien sustegn da nies plevon. Nus havein in cussegl pastoral che sengascha cun tutta premura per il beinstar da nossa cuminonza.

## 3. Petgas da nossa cardientscha

### a) Ductrina

Ella scola da Trun vegn dau ductrina en tuttas classas e cheutras tschentau in bien fundament religius per ils affons. L'instrucziun religiosa vegn instruida 1. tochen 4. classa primara dalla premurada catecheta **Isabelle Defuns-Gamboni**. Ella sengascha fetg cun ils affons per ils survetschs divins per familias. La 5. e 6. classa vegn instruida da **Hubert Venzin** che prepara medemamein l'instrucziun dalla s. Creisma. Il scalem ault vegn instruius da **Gabriela Cabalzar-Lombriser**, ella ha abdicau la piazza sil davos digl onn da scola 19/20. Per sia gronda lavur en favur da nos juvenils lessel jeu engraziari ad ella grondamein.

### b) Fatgs da Baselgia

Tut ils fatgs da Baselgia vegnan avon el rapport dalla presidenta dil cussegl pastoral.

### c) Manteniment dils beins

Per gl'usitau manteniment dils baghetgs sacrali sco era tier las casas pervendas vegn igl administratur a dar plaid e fatg.

#### 4. Personal

##### a) Lecturas e parter ora la s. communiun

Allas lecturas **Annamaria Cavigelli-Tschuor**, **Gabi Cajacob-Mirer**, **Isabelle Defuns-Gamboni**, **Esther Tomaschett-Monn** e **Manuela Wolf-Tomaschett** per Trun, **Marta Bundi-Giger**, **Josefa Wolf-Tomaschett**, **Anita Orlik-Vincenz** per Zignau engraziel cordialmein per lur buns survetschs ch'ellas fan dumengia per dumengia.

##### b) Organists

Malgrad grondas stendas d'anflar in organist stabel che remplazza igl organist Albert Decurtins per nossa baselgia parochiala havein giu negin success.

Mo tuttina ein las suandontas personas promptas da segidar cun nus.

- **Clau Scherrer** ei prompts da sunar l'orgla mintgaga cura ch'el ei disponibels e buca s'engaschus enzanua auter (ca. 2 gadas al meins).
- **Albert Decurtins** ha segidau aunc entochen l'entschatta dalla stad.
- **Jacinta Jacomet-Lombriser** da Mustér segida era ca.1-2 gadas al meins.

Ei ha dau dumengias nua che nus havein giu negin accumpignament cun l'orgla. Per quella situaziun supplichen nus vus da haver capientscha.

Tier sepulturas ha Marcel Pöhl da Mustér segidau in per gadas. Igl ei tuttavia buc sempel d'anflar mintgamai in organist per sepulturas.

A **Claudio Vincenz** engraziein nus cordialmein per la promptadad d'embellir dumengia per dumengia las s. messas cun musica sacrala en la baselgia da Zignau. Mo era als organists dil chor cecilian **Gieri Maissen**, **Clau Scherrer**, **Flurin Monn** e **Flavio Bundi** schein in sincer "Dieus paghi".

##### b) CalustrAs

Special engraziament admittel allas calustras ed als calusters: **Gabi Cajacob-Mirer** per la baselgia parochiala, duront il temps da reconvalescenza dalla calustra Gabi ha siu um Georg e la calustra da Schlans Georgina Flepp-Cahannes segiadau; **Letizia Rensch-Tomaschett** per la baselgia da Zignau, **Georgina Flepp-Cahannes** per la baselgia da Schlans sco era **Tarcisi Guldemann** per Nossadunna dalla Glisch. Senza lur gronda lavur el zuppau funcziunas nies sistem buca. Ei vegn prestau bia e buna lavur nunvesevla, mo pauc da lur lavur vegn enconuschenta a parochianas e parochians.

#### 5. Renconuschientscha ed engraziament

Tgei fuss ina cuminonza senza la lavur da biars funcziunariAs. Quella cuminonza essas vus che separticeps alla veta religiosa en nossa pleiv e caplania cun assister allas s. messas ni d'atras purschidas. Persuenter lessel admetter il duiv engraziament, sperond che nossa cuminonza resti activa era el temps da desinteress per la religiun, sco era per nossa Baselgia catolica romana. Nies zun premurau plevon, sur Tomasz vegn sustenius digl engaschau cussegl dalla pleiv cun la premurada presidenta Cristina Derungs e l'iniziativa catecheta Isabelle Defuns-Gamboni che fan cun lur team in bien fundament, sin il qual nus savein baghegiar si nossas activitads cristianas.

In sincer e profund engraziament ei il minimum ch'jeu sai admetter a mes consuprastonts sco era alla revisura **Lea Alig-Flury** ed al revisur **Gion Friberg**.

Enten il rapport hai menziunau plirs engraziaments. Jeu sperel ch'jeu hai emblidau negin, sche quei fuss il cass, lessel seperstgisar tier quellas personas ed en quei mument era engraziar.

Sco finiziun lessel engraziar a vus, preziasas parochianas e parochians, che segideis adina puspei sin ina u l'autra moda morala ni finanziaria per il beinstar da nossa pleiv ni documenteis, entras vossa preschientscha, dumengia per dumengia vies interess per ils fatgs da nossa religiun.

Sco cuminonza sa la veta da pleiv mo exister cun il sustegn da bia mauns e sur da quels disponin nus aunc il mument. Per tut quei agid e sustegn seigi engraziiau da tut cor.

Trun, mars 2020

*Pieder Decurtins, president*